

四庫全書

集部

欽定四庫全書

集部

雲陽集卷九

詳校官檢討臣德生

中書臣劉源溥覆勘

覆校官中書臣王慶長

校對官中書臣吳裕德

謄錄舉人臣蔣傳馨

欽定四庫全書

雲陽集卷九

元 李祁 撰

禱著

訊蟹說

客有惡蟹者得而束之以蒲坐於庭而訊之曰爾之生也微其為形也不類爾之臂雖長而攘不加奮足雖多而走不加疾而徒欲恣睢睚眦蹙蹙戾契以橫行於世爾果何恃而為此吾將加爾乎熾炭之上投爾乎鼎烹

之中剝爾形剖爾腹解而支體以償爾橫行之罪爾有
說則可無說則死蟹於是怒目突腫掣足露胸喘息既
定乃逡巡而有言曰噫子何昏惑眩瞶而昧於天地之
性乎子之於物也何見其外而不察其內乎子何深於
責物而不為人之責乎吾之生也微吾之形也不類吾
又長臂而多足凡吾之所以為此者天也吾任吾性則
吾行雖橫亦何莫而非天哉吾任性而居吾循天而行
而子欲以是責我是不知天也又吾行雖橫而吾實無

腸無腸則無藏無藏則於物無傷也今子徒見吾外而不察乎吾之內是不知物也世之人固有外狠而中惡者此其内外交暴又非若吾之慳慳乎中也子何不是之責而唯我之求乎又有厚貌而深情者其容色君子也辭氣君子也衣服趨進折旋唯諾皆君子也而其中實嵌巖深幽不可窺測此又大可罪也而吾子之不之責也何居且吾之生也微故吾之欲也易足吾嚼嚙藁秸適可而止飽則偃休乎蛇蟪之穴而無營焉吾又何

求哉吾之行雖橫不過延緣涉獵乎沙草之上於物無損也於類無競也而吾又何罪哉吾任吾性吾循吾天而子欲加我乎熾炭之上投我乎鼎烹之中是亦天而已矣而吾又何辭焉客於是俛首失辭遽解其束而縱之江余嘗讀易至離離為蟹故蟹之剛在外又離為火火炎上故蟹之性躁而急此其得於天有不可變者人為物之靈則雖頑嚚凶辟無不可變彼不可變而不變徒欲以橫行之故猶足以取惡於人況乎可變而不變

則於肆行而不悛者其取惡於人也亦甚矣嗚呼人固異於蟹也異於蟹而不自異焉又反有不蟹若者此豈不深可愧也予嘗聞客訊蟹事又因讀易有感欲書之未能適友人持三蟹圖來觀故為述其說如此觀是圖者苟因予說而推之其亦少有警也夫

三窮後語

予觀新安趙君沆所叙三窮之目其一曰楊伯睿一日楊蘭谷一日費振遠是三君者同仕星源郡中皆能以

清苦自厲其甚者至撝野菜飯脫粟以自給人咸憂其不堪而三君者不以為嘆故軍中呼為三窮一時好事者率為歌詩以稱道之誠以為今之為仕者莫不欲餽輕暖而飫肥甘以自取快足而三君者乃潔志厲操如此是誠可稱道也然予嘗竊有疑於窮字之義蓋窮與貧異貧以財言窮以位言貧從分從貝貝分則貧也窮從穴從躬凡從穴皆有屈伏抑鬱之義若士之處於巖穴之下者皆是也孔子曰貧與賤是人之所惡也富與

貴是人之所欲也以貧與富對言所謂以財言者也孟子曰窮則獨善其身達則兼善天下以窮與達對言所謂以位言者也至李克為魏文侯卜相而其言曰富視其所與貧視其所不取達視其所舉窮視其所不為歷舉而觀之則二字之義不可以一槩而施也明矣今三君者既皆登陟仕路以見用於時而振遠名蹟尤著握太守印章坐堂上走屬吏於庭威足以懾奸豪惠足以恤鰥寡四境之內莫不奔走服役以聽命於指顧之下

若是而猶謂之窮可乎吾故以為若三君者謂之居官而能貧可也謂之廉可也謂之清亦可也若謂之窮則持出於軍中之號而一時之好事者遂從而歌誦之耳予年七十有三羈寒羸困不能復為文詞以譽其厲操之苦乃獨斷斷然較一字於分寸毫釐之末亦可見顛躋之甚而不知其衰老之已極也覽是卷者倘不以予為好辯則予過鮮矣

書郝氏紫芝亭卷後

讀張仲舉諸君紫芝亭卷而知郝氏之世有餘慶也不
有餘慶則紫芝之瑞曷從而致之予固知其必有餘慶
也卷中述其上一世作牧持憲有善績又謂湖州公存
心以仁利物以惠夫如是則郝氏之慶豈一日之積哉
其積之也久則薰為太和萃為芝草亦理之自然者耳
故予於此卷謂其有可稱道者三當羣兇攻逼杭城時
城外墳墓發掘無遺而湖州公之墓不失抔土此其可
稱道者一也紫芝之生適當墓之左莖色咸異衆芝此

其可稱道者二也凡芝之生固足以為異然苟不逢人之知不為人所賞拔則與衆草木無甚相遠今思道之於是芝也卒然相遇於丘墓之間驚喜感歎不啻若獲至寶既名亭以彰之而又能走京師謁館閣諸君請為文以記之為歌詩以形容之使是芝煜然光耀非獨有異於衆草木而且有異於衆芝焉此其可稱道者三也雖然思道之於是芝也豈直以為休徵之應而取之以為他時富貴之兆哉蓋孝子之念其親也登其隴而望

則雖一草之莖一木之枝亦愛之而不敢輕毀折焉而
況乎芝之出乎其類者哉是宜思道之拳拳若是而不
能忘也卷中珠玉璀璨予不復敢贅一辭予獨因念錢
唐西湖之勝山水甲天下而思道家於是湖州公墓於
是不知近年人事風物視嚮時何如至正丁亥予忝司
江浙儒學仲舉奉朝廷命來鏤宋金二史於杭且命儒
司官佐董其事故予得與仲舉同硯席起處者半年後
三年予憂居姑蘓而仲舉再奉旨祭神海上來唁予留

宿而別予既衰耄多病而仲舉年復過予八九歲今當八十有二三矣作此記時不書年月不可考不知近年食啖言笑比向時何似此皆予之所常介然於懷者恨不及一見思道而問之故筆於此

題宋孝宗賜楊誠齋雪圖卷

楊文節公誠齋先生以清白著聞歷事四朝終始一節晚年力辭徵召退休南溪之上老屋一區僅庇風雨長鬚赤腳纔三四人可謂與冰雪同操者也孝宗賜以此

圖其時之先後雖不可知無非欲以表其清節耳然則公之清節固皎皎乎不可尚已而孝宗之賢亦於是而見焉一時君臣相與之意不其盛哉

題宋張叔端畫清明上河圖

周氏所藏清明上河圖乃故宋宣政年間名筆也筆意精妙固自宜入神品觀者見其邑屋之繁舟車之盛商賈財貨之充羨盈溢無不嗟賞歆慕恨不得親生其時親目其事然宋祚自建隆至宣政間安養生息百有五

六十年太平之盛蓋已極矣天下之勢未有極而不變者此固君子之所寒心者也然則觀是圖者其將徒有嗟賞歆慕之意而已乎抑將猶有憂勤惕厲之意乎噫後之為人君為人臣者宜以此圖與無逸圖並觀之庶乎其長守富貴也

題僧雪窓畫蘭卷

予留姑蘓時雪窓翁住承天寺日與予相往來當時達官要人往往求翁為寫蘭石翁恒苦之而予所得於翁

者凡數幅或時相過從焚香煮茶輒取雪色紙為予作
摘竒掇芳小幅尤極瀟灑可愛予常置齋閣中亂來蕩
失俱盡恒眷眷於懷近乃於吳君書室中見此幅位置
蕭遠真此老得意筆也感念之餘就題其後

題周道士止一卷

天下之理必會於一故天下之事必歸於一一者造化
之本源道德之樞要也昔之言道者曰抱一曰守一說
金丹者又有所謂三五一萬事畢者至青霞高士周君

乃復以止一為號蓋學道而能止於一則非常道矣人心萬變紛紜交錯而莫知其所止者總總也苟非知道之深慕道之篤探其本源而執其樞要者其孰能知所止哉又孰能止於一哉吾於是知所敬矣

為馮永言送汪士章歸江東詩引

汪君士章從軍來禾川其始至也禾川之士相與言曰是固新安巨室其祖父多貴顯金紫輿服照耀閭里其子弟習熟聞見被紈綺而飫膏粱驕佚怠傲其能為我

輩友乎已而試日就其庭而升其堂耳其言目其色然
後知士章之賢乃有大過人者士章學有源委固已深
造乎道而猶慊然以為未足孜孜求之不厭處事明決
與人交坦然久而益信於是禾川之士咸願與士章為
友而士章以思省其親歸矣義有所不可留情有所不
能已爰相率賦詩歌以贈而使雲陽李祁序之

三友贊

長松千尺生於崇岡躡躡百卉興臺衆芳唯竹與梅同

我氣味徘徊顧瞻允也其類於焉有人是求是徵爰採
厥美以勗其身惟松之高唯竹之勁惟梅之清亦罔不
競唯是三者其誰友之唯其友之是以似之

翔龍琴贊

龍之矯兮高翔天門洞開兮雲飛揚羣仙結珮參頤頤
天樂廣備陳清商清商流傳下土方美人意重雙明璫
蓬萊瀛洲路何長金徽玉絃在高堂

僧珠仲淵字說

永川之秀有曰珠上人者其字仲淵予既為書二字而復請予為一言予觀諸老師碩儒反覆推究曰珠曰淵義無餘蘊予又惡能復為仲淵贊一言哉然吾觀珠之所以見寶於人者以其出而見於世故人得而寶之彼夜光明月固為天下至寶向使其深藏而不之見焉則人亦孰得而寶之此珠之所以貴乎見知於世也若釋氏之說則不然釋氏往往以珠喻真如實性故欲其晦而弗耀也隱而弗彰也深藏固守而不蘄人之知之也

此則珠之在淵者然也蓋珠之出而見於世則寶之者在人珠之隱而藏諸淵則所寶者在己釋氏之教務自見性夫豈斷人之知之哉仲淵善藏子珠毋使離於淵可也

題張天舉圖書卷

禾川張天舉書生也攻篆刻印章位置風格率不失古意一時士大夫多愛用之間嘗為予作二印予語之曰予老矣無復用意斯文恐負子印方今泰運漸回將見

氛翳開豁辟奎明耀文章翰墨宜有盛於曩時則子之
精藝其見愛用於當時之士大夫者亦將不啻今日矣
子姑待之

黃河清劍銘

姜達泉以黃河清名其佩劍有問之者曰子之劍一器
爾於黃河乎何預達泉曰吾之所以名吾劍者夫豈拘
拘焉以器為哉吾將以著吾志焉耳吾之所以為吾劍
者蓋直以天地為爐以陰陽為炭鼓風雷為橐籥體日

月為光華窺之而莫知其形運之而莫名其妙此吾之
所以為劍也吾之用吾劍也蓋將以割利慾絕恩愛馘
百邪滅萬恠使吾之耳目聰明神氣炳靈溟滓寥廓合
乎太清由吾身而達之天下無不可者且天下猶吾身
也黃河則吾之血氣周流乎吾身者也血氣和則吾身
寧黃河清則天下平吾之所以名吾劍者夫豈苟然而
已哉予聞姜君言始而疑之再而思之終而信之以其
言之近乎道而非徒以欺世而駭俗也故為之銘銘曰

黃河清天下平舉世溷濁滑滑勞其生疇能持寸鐵截
斷黃河清猗嗟乎姜君有此黃河清黃河清天下平

雲陽集卷九

欽定四庫全書

雲陽集卷十

元 李祁 撰

雜著

題畫龍

委蛇蜿蜒與時周旋放之則彌亘乎六合卷之則深潛乎九淵人知其然而不知其所以然

蕭氏仁存堂贊并序

仁之為道大其為効也遠然苟非歷年之久遭世之變

則亦無以驗其効之遠近也廬陵曲山巖崖蕭先生繇
宋科目以仁人心賦入大學上舍凡數年遭值遷革歸
老於山中有元前戊子嘗創屋數間至延祐甲寅科目
興遂擬為鄉校方厓蕭御史為書其扁養吾劉先生為
紀其事至後戊子其孫壽春復拓而廣之又數年而兵
興江南北數百里之地悉為丘墟邑居里舍蕩然罕存
而先生之廬與所創之屋獨屹立煨燼草莽中若有陰
扶而默相之者壽春於是葺之以為堂而以其事語予

余蓋知其先世之澤其為効也遠乃以仁存名其堂且
辭以贊之

秩秩斯堂孰構其始在昔咸淳有斐君子思深才雄蔚
為宗工擢秀藝圃蜚英辟雍國步伊阻爰復我土載經
載營式獲我所我經我營匪圖我私邑有來學我應受
之仁人之心君子之澤鬼神護呵罔有隳側孰纂乃績
有嘉聞孫載瞻斯堂匪仁曷存堂以仁存事繇志繼子
孫承之有永無替

跋蕭如岡詩

詩貴真實不真實不足以言詩古人之詩雖縱橫自恣
不事拘檢而皆實情實景是以千百載而下誦之者如
親見其人親目其事蓋實情實景人心所同貫古今如
一日者也今觀蕭君如岡之詩務敦篤而去輕浮近質
素而遠綺靡雖以拙自命而有至巧者存豈非所謂實
情實景者哉況聞如岡平昔以意度自許好周人之急
成人之善凡義所當為者必力為之與人交必懇懇盡

其誠久而益信其為人如此故其詩如此余因論其詩
乃併論其人焉

題楊清溪畫雪竹

竹以節名雪以潔稱非潔不足以表君子之操非節不
足以表君子之貞誰其為此清溪之清

題羅朝陽詩卷

羈愁老病中得羅朝陽詩於枕上讀數篇至神岡山忽
推枕而起歎曰詩道之廢久矣能如是夫豈不可與言

詩哉由是再讀以至終卷無一不可稱誦者善哉朝陽之為詩也朝陽信廬陵佳士而安成劉太史禾川吳明府又廬陵之鄉先生也朝陽既得聞劉先生之指趣以浚其源而疏其流又得吳先生為之上下評議以助其瀾而揚其波其於詩也允乎其有成矣予雖欲復為朝陽贊一詞其可得哉姑述其略以附卷後

題易子文詩卷

詩道之趨於古此世道之盛也古人不可復見而千載

之下誦其詩者猶足以想見其為人使人欣戴愛慕願
尚友於千載之上此無他人心無古今之異故也人心
無古今之異則夫性情之所感音響之所會其不相合
者寡矣奈何世之言詩者取足於目前習熟卑近自以
為是而詩之去古日遠可勝歎哉近讀易子文詩見其
格調聲韻夙與俗殊固已駸駸乎近古矣蓋其性質不
凡而得於師友之見聞者皆有源委故能脫棄流俗而
欲追蹤古人此其所以為可尚也嗟乎世道之衰愈趨

愈下而子文之詩獨能上追古人此固可為子文喜而亦可為世道歎也

題刊陳所安文集

天馬驍騰早蜚聲於鄂渚鸞鳳伏竄竟殞命於殊鄉愛其人者多得之悲歌慷慨之餘見其文者猶惜其斷簡殘編之末此幸存而未泯尚或望其可傳必有當仁共成勝事寫之琬琰冀千載而不磨報以瓊瑤庶九京之可作

題張天全所刻天君降筆後

張君天全以積誠累行持混元教濟度羣品幽明交通
神靈協贊至有託諸言語筆墨以顯於世非可誣也若
吉州錄事達魯噶齊諾海所述天君降於上高之左惟
能家其事尤著予觀其字體變化飛動盤鬱莫知端倪
有非拘拘焉執筆運肘之為者信乎其不誣也異哉贊
曰

於穆天君來於帝庭赫赫厥聲濯濯厥靈惟筠上高厥

姓惟左受學於張靡敢或墮精神所貫天君是臨神光
奪目竒芬怵心委蛇蜿蜒恍忽恠詭雷擊霆奔雲騰風
起惟神所書豈人之為惟人之行實神之依曰神曰人
是曰一理不愧於人乃感於彼張君之學默契於天既
獲靈異道斯可傳傳之者人助之者神於萬斯年聿觀
厥成

草堂書院藏書銘

秘閣崔堯麗於層霄羣公在天遠不可招聖賢之書有

圖有籍如山如淵浩不可覲矧茲蜀都阻於一隅去之
萬里孰云能徂惟茲達可有惻斯念稽於版籍詢於文
獻北燕南越西陝東吳有刻則售有本則書僕輸肩頽
車通牛汗厥數惟何廿有七萬載之以舟入於蜀江江
神護呵翼其帆檣爰至爰止邦人悅喜藏之石室以永
厥美昔無者有昔舊者新畀此士子懷君之仁朝承於
公夕副於室家有其傳維君之德在昔文翁肇茲戎功
建學立師惠於蜀邦維茲達可宜世作配惠茲蜀邦罔

有內外嗟嗟士子尚其勉旃毋負於君惟千萬年

修靈泉院疏語

靈泉院山川蟠鬱卓鎮西安觀音堂氣象宏深恍如南海既屢遭於兵燹盍更展於良規欲遂經營須憑喜捨一彈指頃嘯呼梓匠輪輿萬劫灰中再現虛空樓閣福田增廣香火彌隆

跋風帆圖

余嘗繇姑蘓泛舟緣海岸掛帆入大江泝流而行一日

踣二三百里舟人偃息嘯歌於帆檣之下而無所用其
力此舟行之快也亂離顛沛逃竄山谷不復有江湖之
跡矣俛仰今昔慨然興懷近觀懋齋俞君所藏風帆圖
悠然有極目千里之勢而煙波雲樹茅屋滄洲歷歷皆
若向時所見令人益重懷感時殊事異安得復假風帆
之便浮游江湖以求向時一日之快哉

題曠維寧思治藁

士君子懷抱材藝遭逢亂離顛沛困踣靡所底止固大

不幸然因是而拂其心挫其氣摧其英華而磨刮洗削其廉隅邊鄙之習卒之就其所已能而增益其所不能此則不幸中之尤幸者余觀曠維寧詩清潤含蓄有憂深思遠之情蓋其詩多亂離以來所作其於人情之難測世道之匪常草木之變衰山川之憔悴遇物興感觸景增懷無不於是乎見故予雖惜其不幸不得遇太平盛時無以發其春容紆餘之思而猶幸其遭逢時變得以增益其所不能況維寧齒髮方壯足以有待而治亂

之機無往不復它時海宇乂安重見太平之盛於是化
王風之黍離為周雅之鳬鷖從容咏嘆而維寧之詩益
昌矣夫豈獨如今之日而已哉詩云魚葭蒼蒼白露為
霜又曰他山之石可以攻玉維寧其益勉之

壽芝贊

凡草木之植勾焉而萌甲焉而拆秀焉而生叢焉蔚焉
而蔽虧乎山林綿絡乎原野其名與數雖神農氏不能
以盡知盡識而唯芝也獨與常產異不根以生不沃以

榮不蓐不櫛而蓬藿蕭艾不得以蔽其美蓋以扶輿潏
決之精蜿蜒清淑之氣蟠結勃鬱而為之故宜為和氣
之符為休徵之應為達官貴人之所賞翫而自昔之翰
苑名流詞林佳士亦往往形之歌辭詠歎而不能自己
也惟是庚寅之歲遼山公彌誕之辰客有以芝草獻者
一本而兩岐形狀秀特蓋芝之生也既與常草木異而
是芝也又與常產之芝異由是衆客交口稱贊嘖嘖予
乃諭於衆曰嘗稽諸仙經雜傳凡芝有五色加以紫為

六芝皆瑞草也生則有雲氣禽獸之異青曰龍芝赤曰丹芝黃曰金芝白曰玉芝黑曰玄芝紫曰木芝然則芝非有定名也世之好事者恒取其奇秀詭持者而翫之於是始有靈芝之名又其生時或有與吉事相符合其先後者於是而又有瑞芝之名今是芝之來也實為遠山公長年之慶尚無以名理有未愜宜命之曰壽芝可乎於是衆客欣然舉酒更賀乃囑筆徵予文以贊之遂為之辭曰

煜煜神芝靈氣所鍾含和毓粹衆芳靡同離羣而生拔
萃而長結英丹崖擢秀華壤矯矯特立亭亭其姸一本
茂美雙枝盤挈如雲之舒綢綵綺美如鸞之翔奮翼軒
翥惟芝之生是曰匪常遇物應兆先幾呈祥聿來於庭
作公壽考天實為之錫以難老既錫以壽亦昌其家玉
樹葱蒨珊瑚交加升彼兕觥酌以春酒服此休嘉以介
眉壽

跋主一先生慙稿

竊讀主一劉先生慙藁歎其浩博淵微敷暢精密而聖
賢之心天人之學古今之變與夫人情物理委蛇曲折
千態萬狀罔不畢備為文為詩為雜筆累累凡數百篇
無不可讀無不可愛蓋先生之學其資之也深其積之
也厚故其發揮著見如此盛矣哉先生之於文也嗟乎
自寇亂以來江湖數千里名藩大閫率為丘墟而吾茶
陵以孤壘獨存吾茶陵薦紳文物素著海內五六年間
彫謝淪落而先生以老成獨存此非先生之幸實斯文

之幸也先生年雖高而耳目視聽不少憊其用力斯文固未艾也況今之求先生者又有甚於昔之求先生者歟先生多賢子若孫凡先生之文未編入者盍相與緝之以示斯文於無窮焉

譚君傳心字說

譚君繼先之號曰傳心夫心者人身之天而至理之所寓也其體虛靈洞徹可以通天地而無間其用博大悠遠可以貫古今而不窮而其微妙發越則止存乎日用

行事之間人惟肆欲妄行無所畏忌知有利而不知有義知有已而不知有人由是昧於理而欺於天方寸之間索無餘蘊上無以繼承先志下無以啟迪後人何莫非此心之所為哉繼先質厚而氣清學廣而行醇行乎州閭施於鄉黨凜凜乎唯恐有一毫之未善焉此其心固可以不違乎理不愧乎天矣吾聞繼先上世祖父多行義君子以忠厚起家以詩禮名世而繼先復能以祖父之心為心繼繼繩繩罔有隳墜其有光於上世也宜

矣苟由是而推之則傳之永世豈有窮哉吾見譚氏之
益昌也詩曰無念爾祖聿修厥德繼先既念之矣貽厥
孫謀以燕翼子繼先其勉之

書烈女龍琇傳後

龍子元視余以其同年貢士劉雲章所撰烈女龍琇傳
蓋其從子孟敬之女嫁為安成劉操婦遇賊李明之衆
義不污而就溺者也嗚呼欲生惡死人情之常也所欲
有甚於生所惡有甚於死天性之正也全其正者為正

人徇其常者為常人士大夫之所講也然而一旦臨事
變決擇去就乃或不如閨門婦女之晰而確如雲章所
云可勝歎哉昔奉天竇氏女被俘不屈史氏榮而書之
今琇先事定計義不辱於俘卓然貞烈殆又過焉後之
秉筆者其尚有徵於斯文哉

題唐子西與游使君帖後

故宋宗學博士唐子西先生與游使君手簡詞翰精潔
丞相周益公及諸老先輩題跋叙述審詳今歸周氏文

府余謂子西先生以文章名當時傳後世其大者固不啻此此特其緒餘者爾然自熙豐至今上下二百餘年風流文采猶於是而可見則亦豈尋常翰墨所可擬倫哉是宜士君子之愛而藏之也

跋怡虛清話

話者日用之常談晉人相尚清虛出入玄要而清談之習遂為一時所宗流弊至遠可畏也蓋其說雖高而難行其理雖勝而無實其旨趣要歸雖灑然可聽而不可

以合聖賢之道談雖清何益哉查君某翁以其日用之間得諸聞見者刊為一編既載其事又復疏其理以示訓戒鑿鑿乎無一語之不可行無一事之不可法無非切於日用之常而不可闕於是而謂之清話其去晉人之談遠矣翁之孫宗礪溫厚純謹能守其訓持是編請余一言故為述此語使世之覽者毋以查君之清話比晉人之清談云

伯昂字說

人之材質高下有萬不齊而其志所趨向則不可以莫之審也故苟得其趨則日進乎高明苟失其趨則日究乎汙下此理之必然無足疑者王氏之子弟曰高而其字曰伯昂字書謂昂從日昂者日之升也日之初升在易為晉故其象曰明出地上晉君子以自昭明德伯昂年未弱冠神朗而氣清其材質固信美矣而凡所以資其材質之美者入而游乎庭則有賢父兄焉出而就乎塾則有良師友焉由是而益志於學守先聖之格言慕

古人之大業毋苟同於俗毋私徇其情如是而益加勉
焉則其德之新也將有如日之方升而漸進乎高明廣
大之域矣他日所就其可量乎雖然此理之有取於日
者然也而天下之物亦莫不皆然喬松聳壑而昂霄則
衆木之叢而附者不足稱也野鶴颺風而孤立則羣雞
之俛而啄者不足數也此又物理之出乎其類而拔乎
其萃者也伯昂而無志於此也則已如有志焉宜於是
乎勉之庶無負乎子之字

海觀字說

海天下之大物也然人知海之為大而不知其所以為大故善觀海者必觀其所以為大者焉今夫海測之而莫知其深望之而莫知其廣舟之航之而莫知其所底止是固可以為大矣觀者於是苟徒見其廣見其無所底止而曰海之大也如是是可以廣吾見矣吁若是者豈為善觀海者哉天下之物小以受小大以受大小受者受小名大受者受大名挾潢汙行潦之量而與之議

洞庭彭蠡夫且不可而況於海乎蓋天下之能受者莫如海物之大者莫如海知所受則可以知其大矣不然則知其大而不知其所以大夫何取於海哉吾宗弟字海觀銳氣而欲求天下之奇聞異見以廣其觀余甚期之而猶恐其所觀之不得其術則徒知海之為大而不切於已故復為之說焉今而欲盡夫觀之之術其必因海之不擇細流也而知一言之微一行之小在已者不可以不謹在人者不可以不容因海之含汙納穢也而

知禍福之來榮辱之至是非得失之交集乎吾前者不可以不順受因海之汪洋浩汗而不自足也知義理之無窮學問之無盡而吾之所以用吾力者不可以不孜孜焉夫如是則觀海之術於是乎在而不為徒觀矣中庸曰今夫水一勺之多及其不測黿鼉蛟龍魚鼈生焉貨財殖焉非吾弟夫誰望哉

重修靈泉院疏語

靈泉寺僧將持疏以謁諸檀那求重建佛舍僧房以復

其舊而請危行老人題其端老人謂今之人雖遭逢世
變然自州閭鄉黨無貴賤高下咸有室廬以安其身以
庇其家人其大者則薨連棟接壯麗瑰偉無不如志乃
獨使佛菩薩無莊嚴供養之地諸比丘無優游栖息之
所於人心宜有所未安試持䟽以往以吾言告之將見
次第圓成種種具備他時爐烟鐘鼓祝頌讚揚福田利
益豈可量哉

跋賀元忠遺墨卷後

亂來顛顛轉徙幾不自聊然猶喜訪故家遺編斷簡庶
幾猶見一二舊時流風餘韻而每不可得近乃得故人
賀君元忠之仲子某所藏其先人手書一卷蓋因離亂
散失再三購求而后得之者也余觀其字體精妙詩思
超軼反覆舒展慨焉興懷因念予平生宦游多在兩浙
而元忠亦然曩余在婺源時浙省請預貢試既出院乃
知元忠適在財賦都府歡會之情傾倒之意磊落豪宕
亦豈知有今日哉卷中詩凡二十首如信河如釣臺如

常山道中八里莊濟上之類皆余所嘗經行者如會稽之蓬萊閣鏡湖亭京口之金山寺則亦余之所嘗登覽而賞翫者也凡所至亦嘗間以小詩紀之今其稿皆無一字存者而元忠此卷乃失而復得則以元忠之有子也又卷中所書陳大卿文一篇全述張小山詞因記余在浙省時領省檄督事崑山坐驛舍中張率數吏來謁一見問姓名乃知其為小山也時年已七十餘匿其年為崑山幕僚遂與坐談笑仍數數來驛中語數日乃別

別時復書其新詞十餘首來餞其詞稍雅正非近世所傳妖淫艷麗之比故余亦頗惜之今此詞亦不復存感念今昔忽忽如夢嗚呼元忠已矣而後死者猶覩焉以視人果何為哉果何為哉雖然元忠已矣而此卷獨存故家之流風餘韻猶幸可見賀氏子弟宜世寶之

跋周益公謨王率齋墓銘後

余讀是誌銘而知富貴之不足道也夫居士以一布衣而其文章學問能令當時諸先輩稱譽推重如此死又

得周文忠公銘可以不朽世之居公卿位震耀一時而名與聲俱泯然與草木同腐視居士為何如哉

洞淵靈壇后土玉主銘

洞淵閣靈跡顯著厥有年矣今又得宋道君所書后土玉主於廬陵之王氏衆咸曰異哉是不可以無銘迺使來請銘曰

崑山之英扶輿之精寶氣四達絪縕乎尹在昔宣和躬修靜默煌煌后祇享祀蠲潔爰制斯玉以禳以祈藏之

名山以昭景釐山君護呵無敢不秘匪玉之奇維神之
賜迺啟靈貺托之於人再拜稽首來獻其珍邦人聚觀
踴躍驚喜宸翰飛揚雲騰霧起罕聞自昔昉見於今是
曰帝祉疇敢不欽鎮之壇壝允也為貴玄教之祥宗風
其昌

劉子行字箴

安成劉君仲賓之子文用字子行余既為書
二字復為辭以箴之其辭曰

君子之道實維其時用舍行藏隨其所之用之在人行則由已勿悖於時勿違乎理藏之於身待用而行有蘊斯發有貞斯亨平平康莊無險無陂坦然由之無遠弗至最哉士子敬之慎之我言匪耄爾行勿疑

王廣微字贊

天下之理有顯有微顯者易觀微者難推而凡於醫理極深突毫釐之差千里之謬惟茲王君洞析玄覽無閤弗察有隱斯闡人之有疾是究是徵內觀脉理外察形

神授以七劑効若神速行之州間取信侯牧藝本於理而況於醫惟醫之良在乎廣微微既充廣道乃昭朗君子體之如指諸掌

題范富二公手帖

右范富二公手帖通一卷巴西鄧先生舉石徂徠詩中語題其後方徂徠作詩時范公適自陝西還朝道中得詩撫股太息至有壞事之語其後范公為叅政富公為副樞范公主西事富公主北事二公方協心殫慮興太

平而飛語上聞羣姦得志於是二公皆以宣撫出矣原其釁始實由此詩蓋以夔契比范富而以大姦斥夏英公諸人宜其日夜腐心切齒思有以報凡可以中傷君子者無不為之又況君子與小人共事則小人必勝而君子必危蓋君子務盡其在己者進退榮辱一歸之天道不可行則引身而退若范富二公之辭位而出是也彼小人貪位固祿躁進妄求不得志則不已此其所以常勝也歟由是觀之則是詩也大則有以激當時之變

使范富二公不得以安其位小而不足以庇其身幾於
剖棺發塚則亦何所利哉雖然是詩之作使天下後世
知君子小人之分如白之於黑如渭之於涇如神龍之
於螭蜥至今讀之猶竦然知所勸戒則亦未可苟訾也
因從范靜翁先生讀此卷故併論之以續鄧語後

書陳氏家譜後

至正八年冬余以叅政蘓公天爵命行淞水西訪求衣
冠世族公意蓋欲萃為一書以著詩書悠久之澤甚盛

心也越明年春正月乃至吳門首得陳氏家譜閱之陳氏之先繇吳興遷長樂凡十有三世而遷延平又八世至尚書公而始大亦可謂遠也已矣後世擢高科躋臚仕者累累有人散居浙江纓簪相屬又可謂盛也已矣若譜序所稱尚書之功蹟朝議之德政諫議之忠節又陳氏之光顯絕特者諫議公平生攻斥奸黨如嚴霜烈日不可干犯而於兄弟極為友愛伯氏早世撫其孤教養嫁娶使皆有成初奏補恩澤舍已子而先伯父之子

噫君子之用心固如此也蓋君子之心仁厚寬廣兄弟
之子視猶己子初無彼此之異今觀陳氏之譜自尚書
公而下愈分而愈盛愈久而愈彰詩書之澤纓簪之懿
至於今而未已則天之所以福陳氏者為何如耶尚書
之十世孫權字以巽諫議之八世從孫也聰敏篤學修
謹有文能世其家業不墜出所藏諫議奏藁及家譜示
余余既錄其譜以復蘇公且書此以荅以巽云

題千氏封贈碑後


尚書干公登第時祁方勉強就學間嘗竊誦公之文而
歆慕之如是者既有年其後幸叨末第佐婺源而公已
去守矣凡公政令之施規撫之略雖獲竊窺一二而猶
以未及一見公為恨如是者又有年既而公主浙江文
衡祁亦列職簾外比出院乃得見公賓館中氣貌魁傑
言議砭讜稱其為文章政事者也於是向者歆慕之心
願見之意始得以少慰焉今年春祁以公事來吳門復
見公於私第乃得讀翰林歐陽公所為公贈封二代碑

銘又知公之晚年所以享優游盛大之福而子子孫孫
繩繩而未已者盖有非一日之積矣積之也厚則其發
之也必宏祁於公夫何羨哉竊獨羨夫卷中所題自歐
陽公而下若中書張公中丞許公祕監黃公凡四人與
公而為五昔延祐初科進士皆位通顯皆負天下重望
圭璋炳煥輝映後先可不謂之盛歟敬仰高風邈如霄
漢噫安得後來科目之得人復有如延祐初元之盛如
此哉

題方寸地說

余與段君篤脩相聞久矣及來姑蘇見其明爽暢達言
議偉然又有其子若孫皆雋秀敦雅足以繼其志而亢
其宗意其得於天者必有異乎常人也及得虞揭諸公
所為方寸地卷觀之然後知其所得於天者蓋在乎此
人之所以為善與不善而子孫之賢否家業之盛衰繫
焉推其所由皆於此乎判今觀篤脩之所得於天者如
此其厚則其方寸之所存從可知矣由念之善而享豐

厚之福於其身又有以及其子若孫焉人亦何樂而不為善哉



雲陽集卷十